



**Les Fleurs Des Vies Des Saints Et Des Festes De Toute
L'Annee, Suivant L'Usage Du Calendrier Romain Reforme**

Augmentees des Saints & Bien-heureux Peres Iesuites, de Saint Charles
Borromeo, & de Sainte Françoise ; Avec le Martyrologe Romain, pour
tous les iours de l'Annee ...

Ribadeneyra, Pedro de

Paris, 1631


La vie de s. Felix.

[urn:nbn:de:hbz:466:1-75777](https://nbn-resolving.org/urn:nbn:de:hbz:466:1-75777)

I.
Avo.

bouche, jettant des cris horribles & espouuantes, le laissa deliuré & sain, comme s'il n'eust iamais eu de mal. L'Euêque de Mets, nommé Diodoric, se trouua present à ce miracle, qui print la chaisne, & dit qu'on luy couperoit plustost la main qu'il la rendist: en fin apres plusieurs contestations & disputes, l'Empereur obtint du Pape, qu'il luy donnast vne boucle de la chaisne, dont il se contenta, & le peuple demoura de plus en plus affectionné au Saint Apostre, & desireux d'honorer ceste chaisne, par laquelle nostre Seigneur faisoit tant de miracles. Supplions la diuine Majesté, que par l'intercession de son glorieux Apostre saint Pierre il nous deliure des dures chaisnes de nos pechez, lesquels il peut luy seul rompre & deffaire de son bras tout-puissant. Le Cardinal Baronijs au 5. Tome deses Annales, escrit assurement des chaisnes de saint Pierre, & de l'institution de ceste feste, & es Annotations du Martyrologe: Sigibert en sa Chronique, l'an de nostre Seigneur neuf cens nonante-neuf. D'autres en escriuent des choses qui sont incertaines, apocriphes, & contraires à la verité de l'Histoire.

LA VIE DE SAINT FELIX
Martyr.

 Ous les Martyrologes Latins, Romain, de Bede, Vsuard, & Adon parlant de saint Felix Martyr de Gironne, principalement celuy d'adon, qui est le plus communément suiuy par les Autheurs des vies des Saints d'Espagne. Le saint faisoit en Gironne l'office d'Apostre & ministre de Dieu, au grand contentement des Chrestiens, & à la confusion des Gentils. Dacien le sceut, & enuoya commission à son Lieutenant Ruffin pour le prendre, & l'honorer, s'il vouloit adorer les faux Dieux, suivant le commandement des Empereurs, ou bien de le faire mourir par des plus cruels tourmens qu'il pourroit excogiter, s'il le trouuoit obstiné. Il fut pris, & Ruffin ne l'ayant peu reduire à sa perfidie, le fit fouetter rudement, les pieds & les mains liées, puis il le fit deualer au plus profond cachot de la prison pour l'attedier de faim & de soif. On le tira de ce cachot, & fut attaché à la queue de deux fortes mules qui le trainerent par les rués de Gironne, deschirant son corps de toutes parts. Estant remené à la prison, il fut visité, consolé, & guaray par vn Ange de ses playes. Le lendemain il fut extrait pour estre derechef tourmenté, ce qu'ils executerent si cruellement, qu'ils luy tindrent depuis le matin iusqu'au soir les pieds attachez en haut, & la teste en bas luy ratissans les costez & le corps avec des peignes de fer, sans que le saint fist paroistre aucun sentiment de douleur. Il passa la nuit suivante dans la prison, où les gardes apperceurent la lumiere celeste qui esclairoit saint Felix, & entendirent la melodieuze harmonie des Anges qui le reconfortoient. Ruffin scachant cela, & in-

digné de se voir tant de fois vaincu, commanda qu'on le jettast bien auant dans la mer, pieds & mains liez; il fut mené enuiron vne lieue du bord, & precipité, mais que peuuent les hommes contre le Seigneur des eaux, & de tout ce qui est creé les Anges le delierent & l'amenerent sur l'eau iusqu'au riuage, dont Ruffin s'offençant plus que iamais, le fit escorcher & déchirer toute la peau avec des ongles d'acier, en forte qu'on luy voyoit les os, & luy donnerent tant de coups les vns sur les autres, qu'il trespassa en ce tourment, ainsi que dit Adon, & que son corps fut enterré au mesme sepulchre qu'il s'estoit préparé, ce qui aduint le 1. iour d'Aouust, auquel tous les Martyrologes parlent de saint Felix de Gironne. Ce saint est fort renommé en Espagne, où on luy porte vne particuliere deuotion, & plusieurs proposent son nom aux enfans qu'on baptise. Le Poète Prudence le celebre comme vn saint, & le Roy Recarede offrit sur son tombeau en Gironne vne couronne d'or, & Nouire Euêque de Gironne (ainsi que dit saint Ildefonse, en son liure des Hommes Illustres) honoroit & reueroit soigneusement le tombeau de saint Felix en son Eglise. Saint Euloge met saint Felix pour exemple de ceux qui s'offrirent au martyre. Le Breuiare de Tholed met vn Hymne de saint Felix. Gregoire de Tours escrit ce miracle de luy: Certains larrons entrerent en l'Eglise de saint Felix de Gironne, l'un d'eux desroba plusieurs ornemens d'or, de soye, & de pierres precieuses, qu'il emporta avec soy. Il rencontra sur le chemin vn homme en forme de pelerin, qui luy demanda où il alloit, auquel il respondit: Si tu veux m'estre secret, ie te montreray vn grand thesor: le passant luy promit, alors il monstra son larcin, disant: si ie peux vendre cela au loing, ie seray riche. I'ay vne maison fort secrette (dit le passant) & beaucoup de bons amis en diuers lieux, si tu le peux apporter chez moy, tu le vendras apres à ton aise. Le larron s'y accorda & le suiuit; mais cuidant estre bien loin, il se trouua dans Gironne (luy ayant bouché les yeux) & estans à la porte de l'Eglise du Saint, voila (dit-il) ma maison, tu y peux bien laisser ces hardes que tu as: le larron se deschargea, alors Dieu luy desilla les yeux, & il recogneut que c'estoit l'Eglise de saint Felix qu'il auoit volée, & le saint qui s'estoit apparu à luy en habit de pelerin, disparut à l'instant: le larron se repentit, & confessa la faute qu'il auoit faite, & ce qui luy auoit adueni par le chemin. S. Gregoire de Tours dit plus, qu'à Narbonne ils auoient quelques Reliques de saint Felix dans vne Eglise que le Roy Alaric fit abbatir par le conseil d'vn de ses courtisans, nommé Leon, afin d'auoir la veuë de son Palais libre sur vn lieu de plaisance qui estoit près de là, on abbatit l'Eglise du saint: mais l'autheur de ce conseil deuint aueugle.